

Wednesday, May 21, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

MZP ON PROXY EMPLOYEE

MZP chuan kumin June ni 13 ral hma ngeiin Zirtirtu aikal la te lakah sawrkar chu action la turin an phut tih an sawi.

Vawiina MZP General Headquarters hruaituten MZP Pisapuia thuthar thehdarhtute an kawmnaah, MZP President H.Lalthianglima chuan Mizoram sawrkarin zirtirtu aikal la titawp tura a hmalakna chu MZP in an thlawp thu leh hetiangaw sawrkarin hma a la ngam hi an lawm tih a sawi a, March thla thla ral hma ngei a, zirtirtu aikal late MZP General Headquarters hnena report tura thu an chhuah hnuah vawiin thlengin, district paruk atangin, sikul 14 a thawk, mi 22 aikal la report an dawn tawh tih sawiin MZP chuan thla thar, June ni 13 ral hma ngeiin Zirtirtu aikal la te lakah sawrkar chu action la turin an phut a, mahni eizawna leh hlawh tam tak an hmuhna pawh rinawm taka thawk thei lote chu sawrkar in banin, a thawk duh leh thawk peihte la turin MZP chuan sawrkar a ngen tih a sawi a ni.

Byte: MZP President

MZP hotute sawi danin Zirtirtu ai kal la mi 22 zingah hian Headmistress pahnih awmin, Upper Primary School, Zohmun leh Govt. Middle School, Rawlbuk Headmistress te an ni a, anni bakah hian Govt. Primary School, Chamdurtlang, leh Damdep II, Middle School atangin zirtirtu 4 ve ve, Upper Primary School atangin zirtirtu 3, Primary School, Zohmun , Bajirungpa Primary School, Govt.P/S II Cherhlun, Govt. Primary school, Leisenzo, Govt. Primary school, N. ZTingmun, Govt. Primary school, Bandiasora, Govt. High School, Rawlbuk, Govt. High School, Cherhlun atang te in zirtirtu pakhat theuhin ai kal an la a, zirtirtu ai kal la report an dawn zingah hian Higher secondary school zirtirtu an awm lo a ni.

MZP President chuan MZP-in zirtirtu aikal late an dap tih an hriat avanga, aikal la ngam lo an awm tih sawiin, report an dawn hnua aikal la ngam tawh lo, thawk leh te pawh an awm a ti a, vawiina an thusawi avanga, aikal la si thawk leh pawh an awm ngei an rin thu sawiin, MZP chuan Mizoram sawrkar hnuaia thawk tura lak zirtirtute chu, lak an nih ang ngeia thawk turin an duh tih an sawi baw.



PHE MINISTER

PHE Minister Prof Lalnilawma'n tui chu ram leilung hausakna mi tin intawm a nih angin tui renchem inzirtir a pawimawh bak ah tui hna humhalh kawngah mitin te thanharh zel a pawimawh thu a sawi.

He thu hi nimina NESIDS OTRI hnuai hmalakna 'Alternate Gravity Water Supply Scheme of Aizawl' Muallungthu-a a hawnna ah sawiin PHE Minister chuan hmasawna inbuktaw, ram leilung hausakna humhalh chung kalpui thiam a tul thu a sawi a, kum 2018 atanga kum 2025 thlenga sorkarna siamtu party pathum leh PHE Department-a thawktute thahnemngaihna leh inpekna avanga 'Alternate Gravity Water Supply Scheme Project' hlawhtlinna an hmu thei chu lawmawm a tih thu sawiin Khawl leh kawlpheh rin ngai lova tui lakkhawl leh sem theih tur a ruahmanna chuan inrenchemna kawngah nasa takin hmasawna a thlen ngei a beisei thu a sawi baw.

Technical report-a tarlan danin he project hi NESIDS funding hnuai Rs 117.3035 crore seng a siam a ni a, a hna hi Kram Infracon Pvt leh Vikas Associates-te tangkawp thawh niin, he project-ah hian tui litre vaibelchhe 248 dawng 'Earthen Dam' tuikhuah, Dilzawl hmunah siam a ni. Tui hi sawngbawl a nih hnuah 450 mm a lian pipe, km 39 a sei hmangin Muallungthu tlanga tui dahkhawlna, Reservoir, tui litre nuai 15 khawl theihnaah chhun luh a ni.



AGRICULTURE MINISTER

Agriculture Minister Pu PC Vanlalruata'n lo neiha eizawna hmasawna atan a hmalakna hrang hrang chhunzawm loh leh hlawhtling zo lo awm thin chu paw a tih thu leh inenfiah tlan ngaih thu a sawi.

Nimina Agriculture & Farmers' Welfare Department Office Conference Hall-ah Agriculture Minister Pu PC Vanlalruata hova Agriculture Department hotuten kum liam taa an hmalakna an thlirhonaah Agriculture Minister chuan he thu hi sawiin, Agriculture & Farmers' Welfare Department chu hmalakna tam tak a lo neih tawh thinah a fuhlo siam that zel tum a ni tih a sawi a, Kuthnathawktute hmasawna atan a hmalakna hrang hrang chhunzawm loh leh hlawhtling zo lo awm thin chu paw a tih thu sawiin, Sawrkar hruaitu, Department a thawkte leh tanpuina dawng thin loneitute thlengin inenfiah tlan a ngai tih a sawi.

Minister chuan thawktute chu tlangram loneitu te nasa leh zuala ngaipawimawh a, an hmasawna tur a ruahmanna thar tha tak siam thei tura chahin, Sawrkar tharin mipuite leh loneitute nena inzawmna tha tak thlai thar sumdawna atan hmangin a buatsaih tih sawiin sumdawna a buai lohna tur thlai an thlan thiam a pawimawh tih a sawi baw.

He hunah hian KVK, Kolasib-in Natural farming chungchanga inzirtirna leaflet pathum an buatsaih chu tlangzarh a ni baw.



ELECTRIC BILL

Power & Electricity Department-chuan Sawrkarin Electric Bill a ti sang lo tih sawiin, mipuite chu chiai lo turin chah.

P&E Department chuan tunhnaiah mi thenkhatin subsidy tel lo rate (Un-Subsidized rate) hmanga electric bill chawi tur zat chhut chhuahna siamin, mipui ti chiai thei zawngin Electric Bill chu Sawrkarin a ti sang anga social

media-a thu an theh darh chungchangah thuchhuah siamin, social media-a thu darh chu thu diklo a nih thu an sawi a, sawrkar chuan langtlang tak thil kalpui a nih theih nan mipui tana electric bill a pek sak zat (electric bill subsidized) chu mipuiin an chhut chhuah ve theih na tur bill body-ah ti lang ngei turin P&E Department a hriattir a, hetihlai hian May thla Bill form chu lo print lawk sa (Pre-printed) a nih avangin subsidy tarlanna tur column a la awm lova, chuti chung chuan mipuiin Sawrkar atanga electric bill subsidy an dawn zat an lo hriat ve theih nan Slab rate zawnah subsidy tello rate (un-subsidized rate) tarlan a ni a, he rate hi mipui chawi tur zat rate a ni lo a ti a. Electric Bill mipuiin an chawi tur dik tak rate chu bill body hnung lamah tarlan tho a ni tih sawiin, Sawrkar chuan Electric Bill a ti sang lova, mipuite chia i lo turin an hriattir tih an sawi a ni.



PM MANN KI BAAT

Prime Minister Narendra Modi chuan tun Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 122-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

